

Na osnovu člana 22 Statuta Brčko distrikta Bosne i Hercegovine ("Službeni glasnik Bosne i Hercegovine", broj 3/07), a u skladu s članom 15 Okvirnog Zakona o osnovnom i srednjem obrazovanju u Bosni i Hercegovini («Službeni glasnik BiH», broj: 18/03), Skupština Brčko distrikta Bosne i Hercegovine na 43. sjednici održanoj 28. februara 2007. godine, usvaja

## Z A K O N O PREDŠKOLSKOM ODGOJU I OBRAZOVANJU U BRČKO DISTRIKTU BOSNE I HERCEGOVINE

### DIO PRVI – OSNOVNE ODREDBE

#### Član 1 (Sadržaj zakona)

Ovim zakonom uređuju se ciljevi i zadaci predškolskog odgoja i obrazovanja, organizacija rada, finansiranje, upravljanje i provođenje nadzora u predškolskim ustanovama Brčko distrikta Bosne i Hercegovine (u daljnjem tekstu: Distrikt).

#### Član 2 (Pozicija predškolskog odgoja i obrazovanja)

Predškolski odgoj je prvi stepen odgojno-obrazovnog sistema koji se bavi odgojem djece predškolskog uzrasta i integralni je dio jedinstvenog obrazovnog sistema u Distriktu.

#### Član 3 (Principi predškolskog odgoja i obrazovanja)

Predškolski odgoj i obrazovanje zasniva se na općeprihvaćenim vrijednostima demokratskog društva i specifičnostima nacionalne, historijske, kulturne i vjerske tradicije naroda i nacionalnih manjina koji žive u Distriktu.

#### Član 4 (Cilj predškolskog odgoja i obrazovanja)

Cilj predškolskog odgoja i obrazovanja je da se u skladu s naučnim dostignućima najmlađoj generaciji osiguraju svi uslovi za optimalan tjelesni, intelektualni, emocionalni i socijalni razvoj, odnosno uspješan daljnji odgoj i obrazovanje.

#### Član 5 (Zadaci predškolskog odgoja i obrazovanja)

Zadaci predškolskog odgoja i obrazovanja su:

- a) da podstiče psihofizički razvoj djeteta i utiče na formiranje ličnosti;
- b) da razvija psihosocijalne, kognitivne i druge sposobnosti djeteta;
- c) da omogući sticanje elementarnih znanja o prirodi i društvu;
- d) da njeguje i obogaćuje dječije stvaralaštvo i sposobnosti izražavanja, govorom, pokretom, likovnim i muzičkim izrazom u igri i drugim aktivnostima;
- e) da zadovoljava potrebe djece za igrom i zajedničkim životom, što utiče na pozitivan emocionalni i socijalni razvoj djeteta, formiranje moralnih osobina, radnih i kulturnih navika;
- f) priprema djece za daljnje odgoje i obrazovanje.

## **DIO DRUGI – PREDŠKOLSKE USTANOVE**

### **GLAVA I. ORGANIZACIJA I RAD**

#### **Član 6**

(Osnivač predškolske ustanove)

(1) Predškolsku ustanovu u skladu sa ovim zakonom mogu osnovati domaće pravno ili fizičko lice samostalno, strano pravno ili fizičko lice samostalno ili zajedno s domaćim pravnim ili fizičkim licem.

(2) Predškolsku ustanovu, kao javnu ustanovu osniva Skupština Distrikta.

#### **Član 7**

(Organizacioni oblici)

(1) Predškolska ustanova, u zavisnosti od vrste programa predškolskog odgoja i obrazovanja koji se ostvaruje u vremenu boravka djece, može se organizovati kao jaslice i vrtić.

(2) U predškolskoj ustanovi može biti jedan ili više oblika organizovanja iz stava 1 ovog člana.

(3) U jaslice se primaju djeca uzrasta od 6 mjeseci do tri godine.

(4) U vrtić se primaju djeca uzrasta od tri godine do polaska u školu.

(5) Djeca iz stava 3 ovog člana razvrstavaju se u odgojne grupe, a broj i sastav odgojnih grupa određuju se pedagoškim standardima.

### **Odjeljak A. Osnivanje**

#### **Član 8**

(Akt o osnivanju)

(1) Prije donošenja akta o osnivanju, osnivač je dužan izraditi elaborat o društveno-ekonomskoj opravdanosti osnivanja predškolske ustanove i dostaviti ga Odjeljenju za obrazovanje (u daljnjem tekstu: Odjeljenje), radi davanja saglasnosti.

(2) Elaborat iz stava 1 ovog člana mora sadržavati bitne elemente koji se odnose na potreban broj djece predškolskog uzrasta, osiguran prostor, stručni kadar i potrebna finansijska sredstva neophodna za realizaciju jednogodišnjeg programa.

#### **Član 9**

(Sadržaj akta o osnivanju)

Akt o osnivanju predškolske ustanove sadrži:

- a) naziv, odnosno ime osnivača;
- b) naziv i sjedište predškolske ustanove koja se osniva;
- c) djelatnost predškolske ustanove;
- d) dokaz o osiguranju sredstava za osnivanje i rad predškolske ustanove;
- e) uslovi i način osiguranja prostora, opreme, nastavnih učila i pomagala;
- f) ime i ovlaštenje direktora predškolske ustanove;
- g) rok za donošenje pravila predškolske ustanove i
- h) druge obaveze osnivača.

Član 10  
(Uslovi za osnivanje predškolske ustanove)

(1) Predškolska ustanova se može osnovati:

- a) ako postoji najmanje 5 odgojnih grupa u skladu s pedagoškim standardima i normativima;
- b) ako je obezbijeđen dovoljan broj radnika odgovarajuće stručne spreme propisane pedagoškim standardima i programima predškolskog odgoja i obrazovanja;
- c) ako je obezbijeđen prostor, oprema i didaktička sredstva u skladu s pedagoškim standardima i normativima.

(2) Propise iz stava 1 ovog člana na prijedlog Odjeljenja donosi gradonačelnik.

(3) Privatna predškolska ustanova se može osnovati bez obzira na broj djece i broj odgojnih grupa, ukoliko je osnivač osigurao potrebna sredstva za rad i ispunio propisane uslove u pogledu prostora, opreme i kadrova, kao i ostale uslove i kriterije utvrđene pedagoškim standardima i normativima.

(4) Pedagoške standarde i normative na prijedlog Odjeljenja donosi gradonačelnik.

Član 11  
(Početak rada predškolske ustanove)

Predškolska ustanova može početi sa radom donošenjem rješenja Odjeljenja o ispunjavanju uslova propisanih ovim zakonom, upisa u sudski registar i registar predškolskih ustanova koji vodi Odjeljenje.

**Odjeljak B. Rad predškolske ustanove**

Član 12  
(Programi)

Predškolske ustanove djelatnost odgoja i obrazovanja vrše u skladu s programima koje na prijedlog Pedagoškog savjeta donosi Odjeljenje.

Član 13  
(Javnost rada)

- (1) Rad predškolske ustanove je javan.
- (2) Predškolska ustanova ima svoj pečat.
- (3) Bliži opis, vrsta, način upotrebe i čuvanje pečata utvrđuju se pravilima ustanove u skladu sa Zakonom o pečatu («Sl. glasnik Brčko distrikta BiH», broj 12/01).

Član 14  
(Pravila o radu)

- (1) Predškolska ustanova ima pravila o radu koja donosi upravni odbor, uz saglasnost Odjeljenja, kao osnovni opći akt predškolske ustanove.
- (2) Pravilima predškolske ustanove, pored pitanja utvrđenih Zakonom uređuju se i pitanja koje se odnose na:
  - a) naziv i sjedište predškolske ustanove;

- b) obaveze predškolske ustanove prema osnivaču;
- c) utvrđivanje vrste, oblika i organizacije odgojno-obrazovnog rada predškolske ustanove;
- d) način ostvarivanja javnosti rada, posebno o programima koji se realizuju u predškolskoj ustanovi;
- e) prijem djece u predškolsku ustanovu;
- f) saradnju sa roditeljima djece upisane u predškolsku ustanovu;
- g) način donošenja kućnog reda predškolske ustanove;
- h) opće akte koji se donose u predškolskoj ustanovi, kao i načinu njihovog donošenja.

(3) Pravila o radu privatne predškolske ustanove donosi osnivač.

#### Član 15 (Godišnji program rada)

- (1) Rad predškolske ustanove utvrđuje se godišnjim programom rada .
- (2) Godišnji program rada javne predškolske ustanove donosi upravni odbor ustanove na prijedlog stručnog vijeća odgojitelja.
- (3) Godišnji program rada privatne predškolske ustanove donosi osnivač.
- (4) Predškolska ustanova obavezna je godišnji program rada dostaviti na saglasnost Odjeljenju, do kraja septembra tekuće školske godine.

#### Član 16 (Izveštaj o radu )

Izveštaj o radu predškolske ustanove za proteklu školsku godinu dostavlja se Odjeljenju, do kraja mjeseca septembra tekuće godine.

### **C. Prestanak rada predškolske ustanove**

#### Član 17 (Osnov za prestanak rada)

Predškolska ustanova prestaje sa radom:

- a) ako više ne postoji potreba za obavljanje njene djelatnosti;
- b) ako prestanu da postoje uslovi za obavljanje djelatnosti;
- c) ako je predškolskoj ustanovi izrečena mjera zabrane obavljanja djelatnosti zbog neispunjavanja uslova predviđenih ovim zakonom, a u ostavljenom roku nije ispunila te uslove;
- d) ako se pravosnažnom odlukom suda utvrdi ništavost upisa u registar;
- e) ako je u nemogućnosti da izvrši zakonom propisane obaveze, a aktom o osnivanju nije utvrđena odgovornost osnivača za te obaveze;
- f) ako se pripoji drugoj ustanovi ili podijeli na dvije ustanove;
- g) ako se organizuje kao drugo preduzeće;
- h) i u drugim slučajevima utvrđenim ovim zakonom.

#### Član 18 (Način prestanka rada predškolske ustanove)

(1) Kada nastupe okolnosti iz člana 17 ovog zakona, Odjeljenje će izdati akt o prestanku rada predškolske ustanove.

(2) Aktom o prestanku rada predškolske ustanove, odredit će se rok o prestanku rada ustanove koji ne može biti prije završetka tekuće školske godine.

#### **Odjeljak D. Prijem i upis djece**

##### **Član 19 (Prijem djece)**

(1) U predškolsku ustanovu se primaju djeca normalnog psihofizičkog razvoja kao i djeca s umanjenim psihofizičkim sposobnostima, dobi od 6 mjeseci do polaska u školu.

(2) Pri upisu u predškolsku ustanovu, dijete mora imati ljekarsko uvjerenje o zdravstvenoj sposobnosti .

(3) Bliži uslovi za upis djece iz stava 1 ovog člana utvrđuju se pravilima o radu predškolske ustanove.

#### **Odjeljak E. Programi odgojno-obrazovnog rada**

##### **Član 20 (Načela za utvrđivanje programa)**

(1) Programi predškolskog odgoja i obrazovanja zasnivaju se na načelima Deklaracije Generalne skupštine Ujedinjenih nacija o pravima djeteta i Konvencije o pravima djeteta, posebno u pogledu zaštite djece od svireposti i nemara, te postupaka koji mogu dovesti do religiozne, nacionalne, rasne ili neke druge diskriminacije.

(2) Programima predškolskog odgoja i obrazovanja utvrđuju se ciljevi i zadaci, sadržaj i vrsta, kao i obim i trajanje odgoja i obrazovanja, metodologija i oblici rada, profil i stručna sprema radnika, te prostor, oprema i didaktička sredstva za ostvarivanje svakog programa.

(3) Programi predškolskog odgoja i obrazovanja kao i druge aktivnosti u predškolskoj ustanovi, realizuju se na bosanskom, srpskom i hrvatskom jeziku i latiničnom i ćiriličnom pismu.

##### **Član 21 (Vrste programa)**

U predškolskoj ustanovi u okviru programa, realizuju se primarni, specijalizovani, prilagođeni program odgojno-obrazovnog rada i program za djecu pred polazak u školu, ako nisu obuhvaćena nekim od oblika predškolskog odgoja i obrazovanja.

##### **Član 22 (Primarni programi)**

Primarnim programom predškolskog odgoja i obrazovanja utvrđuju se obim, oblici i metodologija odgojno-obrazovnog rada na osnovu savremenog pristupa tradicionalnog odgoja i kulturnih tekovina.

##### **Član 23 (Specijalizovani programi)**

Specijalizovani program predškolskog odgoja i obrazovanja sadrži odgojno-obrazovni rad iz muzičke, likovne i dramske umjetnosti, sporta, stranih jezika, rekreacije i sličnih oblasti koje su u funkciji zadovoljavanja posebnih interesa i sklonosti djece.

Član 24  
(Prilagođeni programi)

Prilagođenim programom predškolskog odgoja i obrazovanja utvrđuju se ciljevi i zadaci sadržaja i oblici odgojno-obrazovnog rada za djecu s lakšim poteškoćama u psihomotornom razvoju.

Član 25  
(Program pripreme djece za školu)

(1) Program pripreme djece pred polazak u školu ima za cilj da se djeca koja nisu obuhvaćena predškolskim odgojem i obrazovanjem brže i lakše adaptiraju u školskoj sredini.

(2) Program iz stava 1 ovog člana realizovat će se u školi i predškolskoj ustanovi u trajanju od najmanje 60 sati.

**Odjeljak F. Pedagoška dokumentacija i evidencija**

Član 26  
(Pedagoška evidencija)

(1) U predškolskoj ustanovi vodi se pedagoška dokumentacija i evidencija i to: radna knjiga, matična knjiga djece, karton s podacima o razvoju djeteta, ljetopis ustanove i dr.

(2) Sadržaj obrasca i način vođenja jedinstvene pedagoške evidencije propisuje gradonačelnik.

**GLAVA II. STRUČNI KADROVI**

Član 27  
(Stručna sprema)

(1) Realizaciju programa u predškolskim ustanovama obavljaju odgojitelji sa završenom visokom ili višom stručnom spremom i stručni saradnici s visokom stručnom spremom (psiholozi, pedagozi, ljekari i socijalni radnici).

(2) Realizaciju programa njege i zaštite djece obavljaju stručni saradnici sa završenom visokom, višom ili srednjom stručnom spremom medicinskog smjera.

Član 28  
(Pripravnici)

(1) Odgojitelji i stručni saradnici koji prvi put zasnivaju radni odnos u predškolskoj ustanovi obavezni su da nakon jedne godine, a prije isteka druge godine neposrednog odgojno-obrazovnog rada, polože stručni ispit.

(2) Odgojitelju i stručnom saradniku iz stava 1 ovog člana, koji u roku od dvije godine ne položi stručni ispit, prestaje radni odnos.

(3) Program polaganja stručnog ispita, sastav komisije, način polaganja i sva ostala pitanja vezana za stručni ispit regulišu se aktima gradonačelnika.

(4) Gradonačelnik će u roku od 3 mjeseca na prijedlog Odjeljenja donijeti akte iz stava 3 ovog člana.

Član 29  
(Pripravnik –volonter)

Odgovornik ili stručni saradnik, bez radnog iskustva u struci može u predškolskoj ustanovi kao volonter obaviti pripravnički staž i položiti stručni ispit za samostalan odgojno-obrazovni rad.

Član 30  
(Stručno usavršavanje)

Uslovi i način polaganja stručnog ispita, oblici i način stručnog usavršavanja, ocjenjivanje, napredovanje i sticanje stručnih zvanja nastavnika i stručnih saradnika osnovnih i srednjih škola primjenjuje se i na odgovornike i druga stručna lica u predškolskim ustanovama.

Član 31  
(Ljekarski-sistematski pregled)

(1) Odgovornik i stručni saradnik mora biti ljekarski pregledan do početka školske godine.

(2) Lice iz stava 1 ovog člana koje boluje od zarazne ili duševne bolesti ili ima psihičke poremećaje ne može obavljati odgojno-obrazovni rad u predškolskoj ustanovi.

(3) Ako se u toku školske godine ustanovi da je odgovornik ili stručni saradnik obolio od zarazne ili duševne bolesti ili ima psihičke poremećaje, bit će udaljen iz odgojno-obrazovnog rada u predškolskoj ustanovi.

Član 32  
(Ostalo osoblje)

Određbe člana 31 ovog zakona primjenjuju se i na druge zaposlenike predškolske ustanove.

Član 33  
(Radno vrijeme zaposlenika)

(1) U okviru nedjeljnog radnog vremena, odgovornik ima 30 sati neposrednog odgojno-obrazovnog rada s djecom, a ostalo radno vrijeme odgovornika do 40 sati popunjava se aktivnostima utvrđenim pedagoškim standardima i godišnjim programom rada.

(2) Pedagoškim standardima se utvrđuje vrsta i opis poslova stručnog saradnika u okviru 40-satne sedmice.

(3) Raspored radnog vremena zaposlenika u predškolskoj ustanovi utvrđuje direktor, uz saglasnost Odjeljenja.

Član 34  
(Godišnji odmor)

(1) Zaposleni u predškolskim ustanovama godišnji odmor, po pravilu, koriste u toku ljeta .

(2) Pravilima o radu predškolske ustanove detaljnije se određuje način i uslovi korištenja godišnjeg odmora zaposlenih u predškolskoj ustanovi.

### **GLAVA III. UPRAVLJANJE I RUKOVOĐENJE PREDŠKOLSKOM USTANOVOM**

#### **Odjeljak A. Organ upravljanja**

##### **Član 35 (Upravni odbor )**

- (1) Organ upravljanja u javnoj predškolskoj ustanovi je upravni odbor.
- (2) Članovi upravnog odbora biraju se iz reda osoblja predškolske ustanove, osnivača i roditelja u skladu s propisanom procedurom, a na principu ravnopravne zastupljenosti predstavnika navedenih struktura.
- (3) Upravni odbor predškolske ustanove broji od tri do sedam članova, u skladu s pravilima o radu predškolske ustanove.
- (4) Članovi upravnog odbora imenuju se na period od četiri (4) godine.
- (5) Članove upravnog odbora predškolske ustanove imenuje gradonačelnik uz prethodnu saglasnost Skupštine.

##### **Član 36 (Nadležnost)**

- (1) Upravni odbor obavlja slijedeće poslove:
  - a) razmatra i donosi plan upisa djece;
  - b) razmatra rezultate rada predškolske ustanove;
  - c) na prijedlog vijeća odgojitelja, donosi pravila o radu predškolske ustanove;
  - d) na prijedlog vijeća odgojitelja, donosi godišnji program rada predškolske ustanove;
  - e) provodi postupak izbora kandidata za direktora i osoblje u predškolskoj ustanovi po internom konkursu, odnosno javnom konkursu i donosi odluku o izboru kandidata;
  - f) nadzire rad direktora;
  - g) donosi poslovnik o radu;
  - h) donosi pravila o postupku rada upravnog odbora za izbor direktora i osoblja u predškolskoj ustanovi;
  - i) obavlja i druge poslove u skladu sa zakonom i aktima predškolske ustanove.
- (2) Kandidat koji nije zadovoljan odlukom o izboru kandidata iz člana 36 stava 1 tačka e ovog zakona može izjaviti žalbu Apelacionoj komisiji u roku od 8 dana od dana prijema pismenog obavještenja od Upravnog odbora predškolske ustanove.
- (3) Apelaciona komisija dužna je u roku od 8 dana odlučiti po žalbi i odluka Apelacione komisije je konačna.
- (4) Sva pitanja koja nisu uređena ovim zakonom, a odnose se na postupak za izbor i imenovanje kandidata za direktora i osoblje u predškolskoj ustanovi, primjenjuju se odredbe Zakona o državnoj službi u organima uprave Brčko distrikta BiH ("Službeni glasnik Brčko distrikta BiH" broj 28/06).



Član 37  
(Odgovornost)

(1) Za svoj rad članovi upravnog odbora predškolske ustanove odgovorni su osnivaču i strukturi koju predstavljaju.

**Odjeljak B. Direktor**

Član 38  
(Imenovanje )

- (1) Predškolskom ustanovom rukovodi direktor.
- (2) Direktora javne predškolske ustanove imenuje gradonačelnik, na prijedlog upravnog odbora predškolske ustanove .
- (3) Direktora privatne predškolske ustanove imenuje osnivač.
- (4) Direktor predškolske ustanove imenuje se na period od četiri (4) godine i može biti ponovo imenovan.
- (5) U slučaju da iz nekih razloga direktor nije imenovan, upravni odbor predškolske ustanove će bez javnog konkursa dati prijedlog kandidata za vršioca dužnosti direktora iz reda odgojitelja i stručnih saradnika, koji će tu dužnost obavljati do imenovanja direktora, a najduže šest mjeseci.

Član 39  
(Opći i posebni uslovi)

Za direktora predškolske ustanove može biti imenovano lice koje, pored općih uslova, ima završenu višu ili visoku stručnu spremu, smjera odgajatelj, ili visoku stručnu spremu, sa zvanjem pedagog, pedagog-psiholog i najmanje pet godina radnog iskustva u struci.

Član 40  
(Dužnosti)

- (1) Direktor predškolske ustanove, pored poslova i zadataka utvrđenih zakonom, obavlja i slijedeće poslove:
  - a) rukovodi radom predškolske ustanove;
  - b) zastupa predškolsku ustanovu i osigurava zakonitost rada;
  - c) podnosi izvještaj o uspjehu i postignutim rezultatima odgojno-obrazovnog rada upravnom odboru predškolske ustanove, osnivaču, Odjeljenju i Pedagoškom savjetu koji vrši stručni nadzor;
  - d) odlučuje o raspoređivanju odgojitelja i drugog osoblja predškolske ustanove na određene poslove i radne zadatke i učestvuje u ocjenjivanju njihovog rada;
  - e) prati i usmjerava rad odgojitelja i drugog osoblja predškolske ustanove;
  - f) vrši i druge poslove predviđene pravilima predškolske ustanove.

Član 41  
(Razrješenje )

(1) Ako direktor predškolske ustanove ne ispunjava ovim zakonom i drugim propisima utvrđene obaveze, može biti razriješen dužnosti i prije isteka mandata od četiri godine.

(2) Inicijativu za pokretanje postupka za razrješenje direktora predškolske ustanove, čiji je osnivač Skupština distrikta BiH, može dati Odjeljenje za obrazovanje, član upravnog odbora predškolske ustanove i drugi subjekti koji imaju interes u oblasti predškolskog odgoja i obrazovanja.

(3) Direktora privatne predškolske ustanove razrješava osnivač.

### Odjeljak C. **Stručni organi u predškolskoj ustanovi**

#### Član 42 (Vrste stručnih organa)

Stručni organi u predškolskoj ustanovi su:

- a) Stručno vijeće; i
- b) Stručni aktiv.

#### Član 43 (Stručno vijeće )

(1) Stručno vijeće čine, odgojitelji, stručni saradnici i saradnici.

(2) Stručno vijeće obavlja slijedeće poslove:

- a) prati i analizira organizaciju i realizaciju programa odgojno-obrazovnog rada,
- b) predlaže program stručnog usavršavanja odgojitelja i analizira njegovu realizaciju;
- c) razmatra i utvrđuje prijedlog godišnjeg programa rada;
- d) prati i analizira rad stručnih aktiva i stručnih tijela;
- e) utvrđuje program saradnje sa roditeljima i lokalnom zajednicom i prati njegovu realizaciju;
- f) predlaže kandidate za članove upravnog odbora;
- g) obavlja i druge poslove u skladu sa zakonom i drugim propisima.

(3) Stručnim vijećem rukovodi direktor predškolske ustanove.

#### Član 44 (Stručni aktiv)

(1) Stručni aktiv formira se od odgojitelja po odgojnim grupama u kojima se realizuje odgojno-obrazovni proces.

(2) Stručni aktiv obavlja slijedeće poslove:

- a) stara se o usklađivanju rada istih uzrasnih odgojnih grupa;
- b) prati cjelokupan razvoj i aktivnost djece i predlaže mjere za unapređivanje;
- c) utvrđuje program aktiva i brine se o njegovoj realizaciji;
- d) obavlja i druge poslove u skladu s godišnjim programom rada ustanove.

(3) Stručnim aktivom rukovodi predsjednik aktiva koji se bira na prvoj sjednici aktiva za svaku školsku godinu.

## Odjeljak D. **Vijeće roditelja**

### Član 45 (Osnivanje)

- (1) Predškolska ustanova je dužna da omogući osnivanje vijeća roditelja.
- (2) Članovi vijeća roditelja biraju se iz reda roditelja po proceduri utvrđenoj pravilima predškolske ustanove.

### Član 46 (Nadležnosti vijeća roditelja)

Vijeće roditelja:

- a) promoviše interese predškolske ustanove u lokalnoj zajednici;
- b) predstavlja stavove roditelja upravnom odboru predškolske ustanove;
- c) podstiče angažman roditelja u radu predškolske ustanove;
- d) informiše upravni odbor o svojim stavovima kada ocijeni da je to potrebno, ili na zahtjev upravnog odbora, o svakom pitanju koje se odnosi na rad predškolske ustanove;
- e) kandiduje predstavnika roditelja u upravni odbor.

## **GLAVA IV. FINANSIRANJE PREDŠKOLSKIH USTANOVA**

### Odjeljak A. **Obezbjeđivanje sredstava za realizaciju programa odgojno-obrazovnog rada**

#### Član 47 (Finansiranje)

- (1) Finansiranje predškolskih ustanova vrši se iz sredstava osnivača u skladu s pedagoškim standardima i normativima za predškolski odgoj i obrazovanje.
- (2) Dio sredstava u finansiranju javnih predškolskih ustanova može se osigurati iz sredstava korisnika usluga i donacijama.

### Odjeljak B. **Struktura i način finansiranja**

#### Član 48 (Subjekti finansiranja)

- (1) Osnivač javne predškolske ustanove finansira:
  - a) bruto plaće zaposlenih;
  - b) materijalne troškove;
  - c) osnovna oprema i učila;
  - d) potrošni materijal za odgojno-obrazovni rad;
  - e) amortizaciju i tekuće održavanje;
  - f) osnovni didaktički materijal.
- (2) Korisnik usluga učestvuje u obezbjeđivanju sredstava za:
  - a) troškove ishrane djece;

- b) troškove specijalizovanih programa;
- c) troškove ljetovanja, zimovanja i jednodnevnih posjeta.

(3) Sredstva iz stava 2 ovog člana utvrđuju se godišnje u skladu s aktom koji na prijedlog Odjeljenja donosi gradonačelnik.

(4) Finansiranje privatne predškolske ustanove vrši se iz sredstava osnivača i donacijama.

## **GLAVA V. NADZOR NAD RADOM PREDŠKOLSKE USTANOVE**

### **Član 49 (Nadzor nad zakonitošću)**

Nadzor nad zakonitošću rada predškolskih ustanova vrši Odjeljenje i prosvjetna inspekcija, na način predviđen zakonom.

### **Član 50 (Stručni pedagoški nadzor)**

(1) Nadzor nad stručnim radom predškolske ustanove (u daljnjem tekstu: stručni nadzor) obuhvata:

- a) praćenje rada predškolske ustanove;
- b) praćene realizacije programa predškolskog odgoja i obrazovanja;
- c) pružanje stručne pomoći u planiranju, programiranju i organizaciji odgojno-obrazovnog rada u predškolskoj ustanovi;
- d) praćenje i ocjenjivanje rada odgojitelja, drugih stručnih saradnika i direktora predškolske ustanove.

(2) Stručni nadzor u predškolskim ustanovama vrši Pedagoški savjet.

### **Član 51 (Pristup za vršenje stručnog nadzora)**

Predškolska ustanova dužna je da omogući nesmetano vršenje stručnog nadzora i uvid u dokumentaciju i evidenciju koja se vodi u predškolskoj ustanovi.

## **GLAVA VI. PRIJELAZNE I ZAVRŠNE ODREDBE**

### **Član 52 (Status Dječijeg zabavišta i obdaništa „Naša djeca“ Brčko)**

Skupština Distrikta BiH preuzima prava i obaveze osnivača prema Javnoj ustanovi zabavište i obdanište „Naša djeca“ Brčko.

### **Član 53 (Podzakonski akti i način donošenja)**

Gradonačelnik će u roku od 3 mjeseca, na prijedlog Odjeljenja, donijeti akte predviđene članovima 10, 26 i 48 ovog zakona.

Član 54  
(Status zatečenih odgojitelja)

(1) Zatečeni odgojitelji koji imaju 20 i više godina staža sa SSS i VŠS na dan donošenja ovog zakona mogu obavljati posao odgojitelja do odlaska u penziju.

(2) Zatečeni odgojitelji sa SSS koji stupanjem na snagu ovog zakona imaju manje od 20 godina staža dužni su steći VŠS ili VSS u roku od 5 godina od dana donošenja ovog zakona.

Član 55

Stupanjem na snagu ovog zakona, prestaju da važe propisi koji su se primjenjivali u oblasti predškolskog odgoja i obrazovanja u Distriktu.

Član 56  
(Stupanje na snagu )

Ovaj zakon stupa na snagu 8. (osmog) dana od dana objavljivanja u «Službenom glasniku Brčko distrikta Bosne i Hercegovine».

Broj: 0-02-022-21/07  
Brčko, 28. februar 2007. godine

PREDSJEDNIK  
SKUPŠTINE BRČKO DISTRIKTA BiH

Prof. dr. Milan Tomić



Na osnovu člana 22 Statuta Brčko distrikta BiH – prethodni tekst (Službeni glasnik Brčko distrikta BiH, broj 2/10), Skupština Brčko distrikta BiH, na 2. redovnoj sjednici održanoj 14. decembra 2016. godine, usvaja

**ZAKON**  
**O IZMJENAMA I DOPUNAMA ZAKONA O PREDŠKOLSKOM ODGOJU I**  
**OBRAZOVANJU U BRČKO DISTRIKTU BOSNE I HERCEGOVINE**

**Član 1**

U Zakonu o predškolskom odgoju i obrazovanju u Brčko distriktu Bosne i Hercegovine (Službeni glasnik Brčko distrikta BiH, brojevi: 13/07, 19/07, 39/08 i 21/10), u članu 27a, interpunkcijski znak tačka (.) se briše, umjesto njega se stavlja interpunkcijski znak zarez (,) i tekst „osim u izuzetnim slučajevima, propisanim ovim zakonom“.

**Član 2**

Iz člana 33a dodaju se novi članovi 33b, 33c, 33d i 33e, kako slijedi:

**Član 33b**

Izuzetno od člana 33a, na radno mjesto odgajatelja, stručnog saradnika i kuhara može se angažovati lice, zaključivanjem ugovora o obavljanju privremenih i povremenih poslova.

**Član 33c**

(1) Angažovanje lica po osnovu ugovora o obavljanju privremenih i povremenih poslova vrši se na osnovu saglasnosti Vlade Brčko distrikta BiH, u slučaju:

- a) zamjene odsutnog odgajatelja, stručnog saradnika i kuhara,
- b) nedostatka, odnosno upražnjenih pozicija odgajatelja, stručnog saradnika i kuhara.

(2) Angažovanje lica po osnovu ugovora o obavljanju privremenih i povremenih poslova može trajati do popunjavanja pozicije putem javnog konkursa, koji je nadležno Odjeljenje dužno raspisati u roku od 3 (tri) mjeseca od momenta nastanka potrebe za kadrovima.

**Član 33d**

Lica s kojima se zaključuje ugovor o obavljanju privremenih i povremenih poslova moraju ispunjavati sljedeće uslove:

- a) opće uslove propisane članom 23 stavom 3 Zakona o državnoj službi u organima uprave Brčko distrikta BiH,
- b) posebne uslove predviđene Organizacionim planom, za svako radno mjesto u pogledu vrste i stepena stručne spreme.

### lan 33e

(1) Lica, s kojima se zaključuje ugovor o obavljanju privremenih i povremenih poslova, angažuju se s evidencije Zavoda za zapošljavanje Brčko distrikta BiH, vode i računa o dužini prijave na evidenciji Zavoda za zapošljavanje u struci i strukturi stanovništva.

(2) Lice koje se angažuje, mora biti prijavljeno na evidenciji Zavoda za zapošljavanje Brčko distrikta BiH, najmanje godinu dana prije angažovanja.

### lan 3

Ovaj zakon stupa na snagu narednog dana od dana objavljivanja u Službenom glasniku Brčko distrikta BiH.

Broj: 01-02-17/16

Brčko, 14. 12. 2016. godine

PREDSJEDNIK  
SKUPŠTINE BRČKO DISTRIKTA BIH

**Esed Kadri**



Na osnovu člana 22 Statuta Brčko distrikta Bosne i Hercegovine (Službeni glasnik Brčko distrikta BiH broj 17/08), a u skladu s članom 51 Okvirnog zakona o predškolskom odgoju i obrazovanju u Bosni i Hercegovini (Službeni glasnik BiH, broj 88/07) i članom 76 Poslovnika o radu Skupštine Brčko distrikta BiH (Službeni glasnik Brčko distrikta BiH, broj: broj 17/08), Skupština Brčko distrikta BiH na 19. vanrednoj sjednici održanoj 19. septembra 2008. godine, usvaja

**Z A K O N**  
**O I Z M J E N A M A I D O P U N A M A Z A K O N A**  
**O P R E D Š K O L S K O M O D G O J U I O B R A Z O V A N J U U**  
**BRČKO DISTRIKTU BOSNE I HERCEGOVINE**

**Član 1**

U Zakonu o predškolskom odgoju i obrazovanju u Brčko distriktu Bosne i Hercegovine (Službeni glasnik Brčko distrikta BiH, brojevi 13/07 i 19/07) član 6 mijenja se i glasi:

„Član 6

(Osnivanje predškolske ustanove)

- (1) Predškolsku ustanovu mogu osnovati domaća i strana fizička i pravna lica u skladu sa ovim zakonom.
- (2) Predškolska ustanova, koju osniva Distrikt, ima status javne ustanove i finansira se iz budžeta Distrikta.“

**Član 2**

Član 8 mijenja se i glasi:

„Član 8

(Osnivanje predškolske ustanove)

- (1) Predškolska ustanova može se osnovati kao javna i kao privatna predškolska ustanova.
- (2) Predškolska ustanova, koja se osniva kao javna ustanova, osniva se odlukom koju donosi Skupština Distrikta u skladu sa ovim zakonom.
- (3) Prije donošenja odluke iz stava 2 ovog člana, Odjeljenje izrađuje elaborat o društveno-ekonomskoj opravdanosti osnivanja predškolske ustanove.
- (4) Vlada Distrikta daje saglasnost na elaborat iz stava 3 ovog člana.“



### **Član 3**

U članu 9 stavu 1 iza tačke g) dodaje se tačka h) koja glasi:

„h) vrstu obrazovanja;“

Dosadašnja tačka h) postaje tačka i).

### **Član 4**

U članu 10 stav 2 se briše, a stavovi 3 i 4 postaju stavovi 2 i 3.

Stav 4 ovog člana mijenja se i glasi:

„(4) Pedagoške standarde i normative na prijedlog Odjeljenja donosi Vlada Brčko distrikta BiH (u daljnjem tekstu: Vlada).“

### **Član 5**

U članu 12 riječ: „savjet“ zamjenjuje se riječju: „institucija“.

### **Član 6**

U članu 13 iza stava 1 dodaje se stav 2 koji glasi:

„(2) Nadzor nad javnošću rada predškolske ustanove ostvaruje se u skladu sa podzakonskim aktima.,,

Stavovi 2 i 3 postaju stavovi 3 i 4.

Stav 4 mijenja se i glasi:

„(4) Izrada i upotreba pečata obavlja se u skladu sa Zakonom o pečatu Brčko distrikta Bosne i Hercegovine i pravilima predškolske ustanove.“

### **Član 7**

U članu 18 stavu 1 tekst: „će izdati akt o prestanku rada predškolske ustanove“ zamjenjuju se tekstem: „predlaže osnivaču da donese odluku o prestanku rada predškolske ustanove“.

Stav 2 ovog člana mijenja se i glasi:

„(2) Ako osnivač predškolske ustanove u roku od tri mjeseca od dana dostavljanja prijedloga iz stava 1 ovog člana ne donese odluku o prestanku rada predškolske ustanove, smatra se da je osnivač saglasan s prijedlogom odluke o prestanku rada predškolske ustanove i provodi se postupak brisanja predškolske ustanove iz registra.“

Iza stava 2 dodaju se stavovi 3 i 4 koji glase:

„(3) Odlukom o prestanku rada predškolske ustanove, određuje se rok prestanka rada predškolske ustanove, koji ne može biti kraći od vremena potrebnog za završetak tekuće školske godine.

(4) Odluka o prestanku rada predškolske ustanove objavljuje se u Službenom glasniku Brčko distrikta BiH.“

### **Član 8**

U članu 19 stavu 1 tekst: „djeca sa umanjenim psihofizičkim sposobnostima“ zamjenjuje se tekstem: „djeca s posebnim potrebama“.

### **Član 9**

U članu 24 tekst: „za djecu sa lakšim poteškoćama u psihomotornom razvoju“ zamjenjuje se tekstem: „za djecu sa posebnim potrebama“.

### **Član 10**

U članu 27 stav 1 mijenja se i glasi:

„(1) Realizaciju programa u predškolskim ustanovama obavljaju odgajatelji i stručni saradnici sa završenom visokom stručnom spremom, zanimanja psihologa, pedagoga, pedagoga-psihologa, ljekara, socijalnog radnika.“

Iza stava 2 dodaje se novi stav 3 koji glasi:

„(3) U slučaju deficita kadrova, realizacija programa njege i zaštite može se povjeriti odgajatelju sa nižim stepenom stručne spreme u skladu sa podzakonskim aktom koji donosi šef Odjeljenja na prijedlog Pedagoške institucije.“

### **Član 11**

Iza član 27 dodaje se član 27a koji glasi:

„Član 27a

(Zasnivanje radnog odnosa)

U pogledu uslova, načina i postupka zapošljavanja u javnim predškolskim ustanovama u Distriktu analogno se primjenjuju odredbe dijela sedam Zakona o obrazovanju u osnovnim i srednjim školama Brčko distrikta Bosne i Hercegovine.“

### **Član 12**

U članu 28 stavu 3 riječi: „regulišu se aktom gradonačelnika“ zamjenjuju se riječima: „uređuju se pravilnikom koji donosi šef Odjeljenja.“

Stav 4 ovog člana se briše.

### **Član 13**

Član 31 mijenja se i glasi:

„Član 31

(Ljekarski-sistematski pregled)

- (1) Odjeljenje je dužno prije početka školske godine za sve zaposlenike u predškolskim ustanovama organizovati sistematski ljekarski pregled za tekuću školsku godinu.
- (2) Troškove pregleda snosi Odjeljenje.
- (3) U predškolskoj ustanovi ne može raditi lice koje boluje od zarazne, duševne ili socijalne bolesti, kao što je alkoholizam, narkomanija ili sociopatsko ponašanje.
- (4) Kada komisija utvrdi da postoje indicije da je licu iz stava 1 ovoga člana narušeno psihičko ili fizičko zdravlje u mjeri koja bitno smanjuje njegovu radnu sposobnost, donosi odluku o upućivanju na vanredni ljekarski pregled.
- (5) Komisiju iz stava 4 ovog člana imenuje šef Odjeljenja, koju čine psiholog, pedagog i direktor predškolske ustanove.
- (6) Nakon stručnog nalaza zdravstvene ustanove, Odjeljenje odlučuje o daljnjem angažovanju zaposlenika u skladu sa zakonom.
- (7) Odluku o upućivanju lica iz stava 1 ovog člana na vanredni ljekarski pregled može donijeti upravni odbor na prijedlog direktora predškolske ustanove.
- (8) Licu iz stava 7 ovog člana, koje odbije izvršenje odluke upravnog odbora o upućivanju na ljekarski pregled, prestaje radni odnos.“

#### **Član 14**

Član 35 mijenja se i glasi:

„Član 35

(Upravni odbor)

- (1) Upravni odbor predškolske ustanove (u daljnjem tekstu: upravni odbor) je organ upravljanja u predškolskoj ustanovi.
- (2) Članove upravnog odbora predškolske ustanove koju osniva Distrikt imenuje gradonačelnik.
- (3) Članove upravnog odbora privatne predškolske ustanove imenuje osnivač.
- (4) Upravni odbor sastoji se od pet članova.
- (5) Članovi upravnog odbora biraju se iz reda:
  - a) osoblja predškolske ustanove;
  - b) osnivača;
  - c) roditelja.
- (6) Članovi upravnog odbora biraju se u skladu s propisanom procedurom, a na principu ravnopravne zastupljenosti predstavnika navedenih struktura.

- (7) Sastav upravnog odbora odražava nacionalnu strukturu stanovništva Distrikta, roditelja i osoblja predškolske ustanove.
- (8) Za člana upravnog odbora iz reda osoblja predškolske ustanove i roditelja može biti imenovano lice koje ima najmanje srednju stručnu spremu.
- (9) Za člana upravnog odbora na prijedlog osnivača može biti imenovano lice koje ima najmanje višu stručnu spremu.
- (10) Članovi upravnog odbora ne mogu biti članovi upravnih i drugih odbora političkih organizacija niti biti izabrani dužnosnici i nosioci političkih funkcija.
- (11) Lice može biti član samo jednog upravnog odbora.
- (12) Dužnost člana upravnog odbora vrši se uz naknadu putnih troškova i prisutnosti na sjednicama upravnog odbora.
- (13) Način obračuna navedenih troškova uređuje se odlukom, koju donosi gradonačelnik na prijedlog šefa Odjeljenja.“

#### **Član 15**

U članu 36 stavu 1 tačke e), f), h) brišu se, a tačke g) i i) postaju tačke e) i f).  
Stavovi 2, 3 i 4 ovog člana brišu se.

#### **Član 16**

Član 38 mijenja se i glasi:

#### **„Član 38**

(Imenovanje direktora)

- (1) Predškolskom ustanovom rukovodi direktor.
- (2) Direktora javne predškolske ustanove imenuje gradonačelnik na prijedlog Odbora za zapošljavanje u obrazovnim institucijama, na period od četiri godine, a može ga razriješiti dužnosti i prije isteka mandata, na prijedlog upravnog odbora ili na vlastiti zahtjev.
- (3) Ukoliko direktor nije u mogućnosti da obavlja svoje dužnosti zamjenjuje ga lice koje on ovlasti, u skladu sa organizacionim planom.
- (4) Nakon isteka mandata ili prestanka dužnosti, direktor javne predškolske ustanove ima pravo da se vrati na radno mjesto sa kojeg je imenovan na mjesto direktora.
- (5) Za radno mjesto, upražnjeno imenovanjem direktora javne predškolske ustanove, raspisuje se javni konkurs na određeno vrijeme u trajanju od četiri godine.
- (6) Direktora privatne predškolske ustanove imenuje osnivač.“

#### **Član 17**

Član 39 mijenja se i glasi:

### „Član 39

(Opći i posebni uslovi)

Za direktora predškolske ustanove može biti imenovano lice koje, pored općih uslova, ima visoku stručnu spremu u oblasti predškolskog odgoja, pedagogije, pedagogije-psihologije, specijalne pedagogije ili psihologije i najmanje pet godina radnog iskustva u struci.“

### Član 18

U članu 40 stavu 1 tački c) riječi: „Pedagoškom savjetu koji“ zamjenjuju se riječima „Pedagoškoj instituciji koja“.

U tački d) ovog člana riječi: „učestvuje u ocjenjivanju njihovog rada“ zamjenjuju se riječima: „ocjenjuje njihov rad“.

### Član 19

U članu 41 stav 2 se briše, a stav 3 postaje stav 2.

### Član 20

U članu 47 iza stava 2 dodaje se stav 3 koji glasi:

„Uslovi za primanje i raspolaganje finansijskim sredstvima iz stavova 1 i 2 ovog člana, za predškolske ustanove koje je osnovao Distrikt, detaljnije se utvrđuju podzakonskim aktom koji donosi šef Odjeljenja.“

### Član 21

Član 49 mijenja se i glasi:

### „Član 49

(Nadzor nad zakonitošću)

Nadzor nad zakonitošću rada predškolskih ustanova vrši se u skladu sa odredbama Zakona o obrazovanju u osnovnim i srednjim školama u Brčko distriktu BiH.“

### Član 22

U članu 50 stavu 2 riječi: „Pedagoški savjet“ zamjenjuju se riječima: „Pedagoška institucija“.

Iza stava 2 ovog člana dodaje se novi stav 3 koji glasi:

„(3) Vršenje stručno-pedagoškog nadzora bliže se uređuje podzakonskim aktom koji, na prijedlog Pedagoške institucije, donosi šef Odjeljenja.“

### Član 23

Član 53 mijenja se i glasi:

### „Član 53

(Podzakonski akti)

- (1) Nadležni organi i lica dužni su u roku od šest mjeseci od dana stupanja na snagu ovog zakona donijeti sve podzakonske akte predviđene ovim zakonom.
- (2) Do donošenja podzakonskih akata iz stava 1 ovoga člana primjenjuju se podzakonski akti koji su na snazi na dan stupanja na snagu ovog zakona, ukoliko nisu u suprotnosti sa odredbama ovog zakona.“

#### **Član 24**

Član 54 mijenja se i glasi:

#### **„Član 54**

(Status zatečenih odgajatelja i stručnih saradnika)

- (1) Zatečeni odgajatelj i stručni saradnik koji ima dvadeset i više godina staža u predškolskim ustanovama na dan donošenja ovog zakona može obavljati posao do odlaska u penziju.
- (2) Zatečeni odgajatelj i stručni saradnik koji stupanjem na snagu ovog zakona ima manje od dvadeset godina staža u predškolskim ustanovama dužan je steći stručnu spremu propisanu organizacionim planom, da bi zadržao status, u roku od pet godina od dana donošenja ovoga zakona.
- (3) Licu iz stava 1 ovog člana prestaje radni odnos po sili zakona, ukoliko ne stekne potrebnu stručnu spremu u roku iz stava 2 ovog člana.
- (4) Licu iz stava 1 ovog člana koje nema položen stručni ispit propisan organizacionim planom, kao poseban uslov za njegovo radno mjesto, prestaje radni odnos po sili zakona ukoliko ne položi stručni ispit u roku od godinu dana od dana stupanja na snagu ovoga zakona.

#### **Član 25**

Ovaj zakon stupa na snagu osmog (8.) dana od dana objavljivanja u Službenom glasniku Brčko distrikta Bosne i Hercegovine.

Broj: 01-02-176/08  
Brčko, 19. septembra 2008. godine

**PREDSJEDNIK**  
**SKUPŠTINE BRČKO DISTRIKTA BiH**  
Prof. dr. Milan Tomić, s.r.

Na osnovu člana 22 Statuta Brčko distrikta BiH – prečišćeni tekst (Službeni glasnik Brčko distrikta BiH, broj 2/10), a u skladu sa članom 51 Okvirnog zakona o predškolskom odgoju i obrazovanju u Bosni i Hercegovini ( Službeni glasnik Bosne i Hercegovine, broj 88/07), Skupština Brčko distrikta BiH, na 27. redovnoj sjednici održanoj 16. juna 2010. godine, usvaja

## **Z A K O N**

### **O IZMJENAMA I DOPUNAMA ZAKONA O PREDŠKOLSKOM ODGOJU I OBRAZOVANJU U BRČKO DISTRIKTU BOSNE I HERCEGOVINE**

#### **Član 1**

U Zakonu o predškolskom odgoju i obrazovanju u Brčko distriktu Bosne i Hercegovine (Službeni glasnik Brčko distrikta BiH, brojevi 13/07, 19/07 i 39/08) u članu 24 iza stava 1 dodaju se novi stavovi 2, 3, 4, 5 i 6 koji glase:

- „(2) Dijete iz stava 1 ovoga člana je dijete čiji je status određen u skladu s Pravilnikom o smetnjama u razvoju koji donosi šef Odjeljenja za zdravstvo i ostale usluge (u daljnjem tekstu: Odjeljenje za zdravstvo) kao i nadareno dijete.
- (3) Nadareno dijete je dijete koje ima određene sposobnosti za razne vrste umjetnosti ili sporta.
- (4) Za svako dijete iz stava 2 ovoga člana predškolska ustanova je dužna da pokrene proceduru izrade individualnog obrazovnog plana prilikom upisa u predškolsku ustanovu.
- (5) Rok za izradu prvog individualnog obrazovnog plana je najkasnije tri mjeseca od pokretanja procedure iz stava 4 ovoga člana.
- (6) Individualni obrazovni plan se izrađuje u skladu s pravilnikom koji donosi šef Odjeljenja nakon pribavljenog mišljenja Odjeljenja za zdravstvo.“

#### **Član 2**

Član 25 mijenja se i glasi:

#### **„Član 25**

(Vrijeme obaveznog uključivanja djece u predškolsko obrazovanje)

- (1) U godini pred polazak u osnovnu školu, predškolski odgoj i obrazovanje obavezno je za svu djecu predškolskog uzrasta.
- (2) Predškolski odgoj i obrazovanje je planirana aktivnost koja traje najmanje 150 sati, a može se organizovati jednom ili nekoliko puta u sedmici u najdužem dnevnom trajanju od tri sata, u skladu sa potrebama i interesima porodice i djeteta.
- (3) Predškolski odgoj i obrazovanje iz stava 2 ovoga člana realizuje se u školi i predškolskoj ustanovi.
- (4) Predškolski odgoj i obrazovanje iz stava 2 ovoga člana finansira Odjeljenje.
- (5) Predškolska ustanova je obavezna svakom djetetu koje je pohađalo predškolski odgoj i obrazovanje izdati potvrdu.

#### **Član 3**

Iza člana 31 dodaje se član 31a koji glasi:

**„Član 31a**  
(Dužnost sufinansiranja)

Odjeljenje za zdravstvo dužno je sufinansirati:

- a) preventivne programe i programe zaštite i unapređenja zdravlja djece;
- b) potrošni materijal za jaslice;
- c) profesionalno usavršavanje zdravstvenih djelatnika i specijalnih pedagoga;
- d) pregled djece pred upis u predškolsku ustanovu.“

**Član 4**

Iza člana 33 dodaje se član 33a koji glasi:

**„Član 33a**

(Zamjena odsutnog odgajatelja i stručnog saradnika)

- (1) Zbog potrebnog kontinuiteta odgojno-obrazovnog procesa, u slučaju privremene spriječenosti za rad, plaćenog i neplaćenog odsustva, odgajatelj i stručni saradnik zamjenjuje drugog odgajatelja i stručnog saradnika.
- (2) Osnovna plata zaposlenog koji radi na zamjeni zaposlenika iz stava 1 ovoga člana uvećava se u skladu sa brojem sati.
- (3) Cijena sata iz stava 2 ovoga člana određuje se podzakonskim aktom koji donosi Vlada Distrikta, na prijedlog šefa Odjeljenja.
- (4) Zamjena odsutnog odgajatelja i stručnog saradnika iz stava 1 ovoga člana, može trajati najduže do tri mjeseca.“

**Član 5**

Član 39 mijenja se i glasi:

**„Član 39**

(Opći i posebni uslovi)

Za direktora predškolske ustanove može biti imenovana osoba koja pored općih uslova ispunjava i sljedeće posebne uslove:

- a) visoka stručna sprema u oblasti predškolskog odgoja, pedagogije, specijalne pedagogije, psihologije ili pedagogije-psihologije;
- b) najmanje pet godina radnog iskustva u struci nakon sticanja visoke stručne spreme;
- c) izražene organizacione sposobnosti.

**Član 6**

(1) Iza glave V dodaje se nova glava Va koja glasi:

„GLAVA Va – KAZNENE ODREDBE

**Član 51a**

(Novčana kazna od 2.000 KM do 10.000 KM)

(1) Novčanom kaznom od 2.000 KM do 10.000 KM bit će kažnjena za prekršaj predškolska ustanova ako:

- a) započne sa radom prije donošenja Rješenja o odobrenju za obavljanje djelatnosti predškolskog odgoja i obrazovanja (član 11);
- b) nastavi obavljati djelatnost suprotno članu 17 tački c ovoga zakona.

(2) Za prekršaj iz stava 1 ovoga člana bit će kažnjeno i odgovorno lice u predškolskoj ustanovi novčanom kaznom od 500 KM do 3.000 KM.



(3) Za prekršaj iz stava 1 ovoga člana uz novčanu kaznu može se izreći i zaštitna mjera zabrane obavljanja djelatnosti predškolskoj ustanovi.

(4) Za prekršaj iz stava 1 ovoga člana uz novčanu kaznu iz stava 2 ovoga člana može se izreći i zaštitna mjera zabrane obavljanja dužnosti odgovornom licu u predškolskoj ustanovi.

#### Član 51b

(Novčana kazna od 1.000 KM do 5.000 KM)

(1) Novčanom kaznom od 1.000 KM do 5.000 KM bit će kažnjena za prekršaj predškolska ustanova ako:

- a) ne dostavi u roku godišnji program rada (član 15 stav 4);
- b) ne dostavi u roku izvještaj o radu (član 16);
- c) zaposli lice neodgovarajuće stručne spreme za realizaciju programa u predškolskim ustanovama (član 27 stav 1);
- d) zaposli lice suprotno članu 27a ovoga zakona;
- e) ne osigura zdravstveni pregled zaposlenika (član 31 stav 1);
- f) zaposli lice suprotno članu 31 stavovi 2 i 3 ovoga zakona.

(2) Za prekršaj iz stava 1 ovoga člana bit će kažnjeno i odgovorno lice u predškolskoj ustanovi novčanom kaznom od 500 KM do 2.000 KM.

#### Član 51c

(Novčana kazna od 1.000 KM do 3.000 KM)

(1) Novčanom kaznom od 1.000 KM do 3.000 KM bit će kažnjena za prekršaj predškolska ustanova ako upiše dijete bez uvjerenja o zdravstvenoj sposobnosti.

(2) Za prekršaj iz stava 1 ovoga člana bit će kažnjeno i odgovorno lice u predškolskoj ustanovi novčanom kaznom od 300 KM do 1.500 KM.

#### Član 51d

(Novčana kazna od 500 do 1.500,00 KM)

Novčanom kaznom od 500,00 do 1.500,00 KM kaznit će se za prekršaj roditelj odnosno, staratelj koji svom djetetu, koje nije pohađalo predškolsku ustanovu, ne obezbijedi redovno pohađanje pripreme za školu u godini pred polazak u školu.“

#### Član 7

Ovaj zakon stupa na snagu osmog dana od dana objavljivanja u Službenom glasniku Brčko distrikta Bosne i Hercegovine.

Broj: 01-02-249/10  
Brčko, 16. juna 2010.

PREDSJEDNIK  
SKUPŠTINE BRČKO DISTRIKTA BiH

**Mirsad Đapo, dipl. pravnik, s.r.**

**ZAKON  
O IZMJENI ZAKONA O PREDŠKOLSKOM ODGOJU  
I OBRAZOVANJU U BRČKO DISTRIKTU BiH**

**Član 1**

U Zakonu o predškolskom odgoju i obrazovanju u Brčko distriktu BiH ("Službeni glasnik Brčko distrikta BiH", broj: 13/07) u članu 10 stavu 2 riječi: "na prijedlog Odjeljenja donosi gradonačelnik" zamjenjuju se riječima: "donosi šef Odjeljenja".

U stav 4 ovog člana riječ: "gradonačelnik" zamjenjuje se riječima: "Vlada Brčko distrikta BiH (u daljnjem tekstu: Vlada)".

**Član 2**

U članu 26 stavu 3 riječ: "gradonačelnik" zamjenjuje se riječima: "šef Odjeljenja".

**Član 3**

U članu 48 stavu 3 riječ: "gradonačelnik" zamjenjuje se riječju: "Vlada".

**Član 4**

U članu 53 riječ: "gradonačelnik" zamjenjuje se riječima: "šef Odjeljenja, odnosno Vlada na prijedlog Odjeljenja, ", a riječi "na prijedlog Odjeljenja" se brišu.

**Član 5**

Ovaj zakon stupa na snagu 8. (osmog) dana od dana objavljivanja u "Službenom glasniku Brčko distrikta BiH".